



Barisan anggota PALAPES USIM bergambar bersama-sama Prof Musa (duduk, lima dari kiri) dan pengurusan USIM.

Muhammad Siddiq terima Anugerah Pegawai Muda Terbaik

Oleh Syazlina Jamil
bhvarsiti@bh.com.my

► Nilai

"Penyertaan saya dalam Pasukan Latihan Pegawai Simpanan (PALAPES) dapat membentuk disiplin diri dan nilai kepimpinan, tanggungjawab dan kerja berpasukan yang tinggi," kata Muhammad Siddiq Rohizan.

Muhammad Siddiq ialah antara 70 anggota PALAPES Universiti Sains Islam Malaysia (USIM) yang diraikan pada Majlis Santapan Malam Regimental bersama-sama Yang di-Pertuan Besar Negeri Sembilan, Tuanku Muhriz Tuanku Munawir, yang juga Canselor UKM dan Tunku Ampuan Besar Negeri Sembilan, Tuanku Aishah Rohani Tengku Besar Mahmud selaku Canselor

USIM, baru-baru ini.

Yang turut hadir ialah Menteri Besar Negeri Sembilan, Datuk Seri Utama Mohamad Hasan; Timbalan Menteri Perdagangan Antarabangsa dan Industri, Datuk Ahmad Maslan; Naib Canselor UKM, Prof Datuk Dr Noor Azlan Ghazali dan Naib Canselor USIM, Prof Dato Dr Musa Ahmad.

Pada majlis itu, Muhammad Siddiq turut dipilih sebagai penerima Anugerah Pegawai Muda Terbaik selain Muhammad Qusyairi Muda yang menerima Anugerah Khas Komandan Pegawai Muda Terbaik.

Watikah pentauliah

"Alhamdulillah, kesibukan saya sebagai pelajar dan pada masa sama menjalani tanggungjawab sebagai pegawai kadet PALAPES dapat ditangani dengan baik.

"Malah, anugerah yang diterima ini adalah sesuatu yang tidak disangka," kata Muhammad Siddiq.

Sebelum ini, anggota PALAPES USIM yang terdiri daripada 41 lelaki dan 29 perempuan menerima watikah pentauliah sebagai Leftenan Muda yang disampaikan Sultan Selangor, Sultan Sharafuddin Idris Shah Sultan Salahuddin Abdul Aziz Shah pada Istiadat Pentauliah Diraja Pegawai Kadet PALAPES Universiti Awam ke-34 di Universiti Putra Malaysia (UPM), baru-baru ini.

Mereka berjaya menamatkan kursus dan latihan PALAPES selama enam semester yang diadakan bersama-sama pasukan PALAPES UKM.



Muhammad Siddiq menerima sebilah pedang daripada Tuanku Muhriz sebagai simbolik penganugerahan Anugerah Pegawai Muda Terbaik.



Prof Musa (depan) beramah mesra dengan anggota PALAPES USIM, sambil diperhatikan Timbalan Naib Canselor dan Alumni USIM, Prof Dr Hassan Basri (kiri).

“ANUGERAH YANG DITERIMA INI ADALAH SESUATU YANG TIDAK DISANGKA”

Muhammad Siddiq,
Penerima Anugerah Pegawai Muda Terbaik